

## IOANE ENA REVAREVA IHATOINA

<sup>1</sup> Lau ekalesia ena gunalaia tauna ese lauegu lalokau Gaio, oi dekenai inai revareva lau torea inai. Oi lau lalokau henia mai momokani danu.

<sup>2</sup> Lauegu lalokau tauna e, Dirava lau noia, gau ibounai oi karaia ese namo do idia havaraia, bona lau noia danu, oiemu tauanina ena mauri ibounai do ia namo. Badina lau diba vadaeni oiemu lauma ia namo noho.

<sup>3</sup> Keristani varavara taudia haida idia mai, lau idia hamaoroa oi be kara momokani tauna. Vadaeni lau moale bada, hereva momokani ena dala dekenai oi raka noho dainai.

<sup>4</sup> Bema lau kamoni, egu natuna Keristani taudia ese Dirava ena hereva momokani ena dala dekenai idia raka noho, vadaeni lau moale bada herea. Moale ta ese unai moale ia hereaia diba lasi.

### *Gaio ena gaukara namona*

<sup>5</sup> Lauegu lalokau tauna e, oi ese oiemu Keristani varavara taudia oi durua noho, be gaukara namo herea oi karaia. Oibe, oiemu kara be namo bada, badina idia be idau taudia oi dekenai.

<sup>6</sup> Idia ese iniseni idia noho ekalesia ore a taudia idia hamaoroa vadaeni, oi ese idia oi durua noho, bona idia oi lalokau henia. Mani emu kara, idia ma do oi durua noho, vadaeni edia laolao dekenai do idia lao, Dirava ena ura dalana hegeregerena.

<sup>7</sup> Badina be Keriso ena ladana dainai edia hanua idia raketania, bona edia laolao totona, durua kara ta Keristani lasi taudia dekena amo idia abia dae lasi.

<sup>8</sup> Ita Keristani taudia ese inai bamona taudia ita durua be namo. Badina unai dekenai amo, Dirava ena hereva momokani durua totona do ita gaukara hebou namonamo.

*Diotrepe ena kara be dika*

<sup>9</sup> Revareva kwadogina ekalesia orea dekenai lau torea vadaeni. To Diotrepe, sibona ia gwaurai ia be gunalaia tauna, ia ese lauegu hereva ia kamoni henia lasi.

<sup>10</sup> Unai dainai, umui dekenai do lau mai neganai, iena kara do lau laloatao. Ia ese mai hereva dika bona koikoi danu aiemai kara ia maumaurai noho. Bona inai sibona lasi, to Keristani varavara taudia idia vadivadi henia gwaurai neganai, Diotrepe ese idia ia abia dae lasi. Ma inai vadivadi taudia idia ura abia dae taudia edia dala be Diotrepe ese ia koua. Ma ia ese unai abia dae kara taudia be ekalesia dekenai amo ia atodia siri gwaurai danu.

*Demetrio be kara namo tauna*

<sup>11</sup> Lauegu lalokau tauna e, dika tauna ena kara bamona do oi karaia lasi, to namo tauna ena kara bamona do oi karaia. Kara namo ia karaia noho tauna be Dirava ena tauna. To kara dika ia karaia noho tauna ese Dirava ia itaia lasi.

<sup>12</sup> Ibounai idia gwau Demetrio be kara namo tauna. Dirava ena hereva momokani ese danu ia gwaurai, ia be tau namona. Ai danu Demetrio ai gwaurai ia be namo, bona umui diba aiemai hereva be momokani.

*Dokona herevadia*

<sup>13</sup> Lau ura hereva momo umui dekenai lau hamaoroa, to lau ura lasi pepa dekenai lau torea.

<sup>14</sup> Nega sisina ia ore, lau ura oi dekenai do lau mai vadivadi, vadaeni ita ruaosi do ita hereva-  
hereva.

<sup>15</sup> Lau ura maino oi dekenai do ia noho. Oiemu turana iniseni ese oi idia hanamoa noho. Lauegu turana unuseni, ibounai ta ta dekenai lauegu hanamoa do oi henia.

**Buka Helaga**  
**The Holy Bible in the Hiri Motu language of Papua New Guinea**

**Nupela Testamen long tokples Hiri Motu long Niugini**

Copyright © 1964, 1982, 1994 The Bible Society of Papua New Guinea

Language: Hiri Motu (Motu, Hiri)

Translation by: The Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 1 Oct 2024 from source files dated 31 Aug 2023

a2c3805d-63d1-5cb3-b80b-d668617d4202